

四庫全書

集部

欽定四庫全書

篁墩文集卷四十六

明 程敏政 撰

碑誌表

故奉政大夫常德府同知致仕李公墓表

知徽州府事李君聞其父常德公之喪即日解官為位持服不佞往弔之號慟以請曰吾父明年壽八十矣計將以入覲禮成取道東還與吾兄弟六人者上堂稱慶少遂愛日之私不幸而遭茲大故將歸卜新阡以圖襄

事惟是墓上之石所以賁終昭遠者敢以累執事不佞  
固辭不獲命退而考其事狀次第書之曰公諱泰字景  
和濟南新城人其上世以產雄邑中丁亂而圯至公曾  
大父善始克以孤莸有立復其家大父彥實父從亮皆  
淳謹嗣拓其先業益盛彥實以公貴贈文林郎龍陽知  
縣加贈奉政大夫常德府同知妣郭氏累贈宜人公兄  
弟兄四然父母獨竒愛公曰興吾家者必季子也稍長  
遣補縣學生敏悟過人職學者恒以魁選期之而公數

奇不偶上太學行益勵不欲為佔畢之學自號敬軒以  
見志景泰丙子遂入吏部銓廷授保定之慶都知縣居  
未朞而政即緒丁內艱民詣上官請留不果天順庚辰  
服闋徙湖廣常德之龍陽值連歲曠荒民大疫公盡却  
自奉禱而雨又勸分遠邇得泉穀則驗口以給市藥以  
瘳所全活者數萬更與置耕具種子還其所售子女田  
宅壯與室瘞與槥撫摩招徠境內晏然為之謠曰李父  
母來何遲早來不使吾民饑其得民如此邑大堤民半



居其下值江漲公督民修守勢將決仰天祝曰寧殺令  
不可殺吾赤子語畢漲落邑當徵巨杉三百株以不忍  
坐視親歷山中遇中材者買得之數足而阻於險復禱  
得雨浮澗以出辰貴夷兵從王師征廣西悍不可制上  
司檄路旁民移避四十里公歎曰曷至此耶止勿避第  
豐其餽廩而分督人巡視諭之法夷兵過迄不敢逞巡  
按御史數才公以聞賜勅旌異進常德府同知民數千  
遮道悲慟衣履為之分裂公一一撫之曰我將加惠若

乃去常德學久弊公心語曰是非所以本政化也規措一新丁祭日井忽告涸榮而得泉郡人志之蘄黃清軍者弗克事巡撫都御史委公公於衆中察數人者詞色異拘之別所少頃果有發其奸者人驚以為神由是爭自首得久不從役者三千餘尋署知長沙府事事治民孚一如常德湖南軍興公督民兵數千入辰沅助官軍又部公帑數萬赴武岡糴軍餉皆有成績而還歲造幣惡兩司官率坐累左遷議屬公公減常價三之一幣成

無不中度者巡按御史復上之朝賜誥旌異將有守郡之擢而公浩然有去志矣公孝友恭儉出天性律已嚴筮仕日即召諸子曰汝曹勿以吾得官可自肆命誓其志於庭長者請業醫次者請業儒幼者請如次兄志公始釋然請業儒者即今太守君也家居十八年起居服食不異韋布鄉閭相戒以不義為恥邑大夫就而問政如禮大師焉卒以弘治壬子四月二十有五日生年七十有九疾革命書遺言戒仲子曰廉慎終始為國為民

戒諸子曰勤儉苦學毋墮先業語不及私配黃氏贈宜人繼羅氏封宜人皆以賢明佐公嫺黨稱之子男六人長延年義官以醫鳴次延壽成化己丑進士歷監察御史以直道外補起知徽州府事次延齡太學生皆黃出次延福次延祺並為儒學生次延祿延祺羅出延福延祿皆側室田出女三人長早世次適士人賀春次適儒學生陳謙孫男八人長璋次琇次瑁次琮次璜次珩次璇次璫孫女六人噫不佞嘗承乏史氏矣觀公之所樹

立若龍陽常德之政視古循良之臣豈多讓哉矧象賢之子紹其學名益顯法其政惠益弘所以敬承公後歸然為一時之望者蓋方進未已也然則漏泉之澤汗竹之紀大筆特書當不日見之公又何憾於九京也哉是為表

翠環處士胡君墓誌銘

新安舊俗有得於先正之遺風故好禮尚約無慕於豪侈之習四方以為難數十年來漸以銷斲而莫甚於親

喪飾殯儀崇佛事僭儀踰越所費不貲附身與棺者甚  
略而述德誄行昭遠垂後之作無聞焉間有之則亦取  
具示觀聽爾非用其情也歛胡氏子宗介其友王宗植  
氏以狀來請其考君處士之墓之銘詞核意勤出其儔  
輩甚遠會予以疾謝文事然悼今撫昔義不獲辭處士  
諱虎字士儀世居歛琶塘曾祖先遠當元季嘗起義捍  
盜以安鄉人其配則師山先生鄭公女弟也祖伯恭國  
初被薦不起吟嘯翠屏山下學者號翠屏先生考彥美

亦名士祖妣許妣吳繼鄭皆里之舊家處士自幼敦敏如成人居勵學出幹蠱務得其二親之心乃已彥美君嘗葺譜收族處士佐為之不以疏逖豐歉為詳略執二親之喪過哀而營壙妥靈必以禮里居琶川原有陂塘中塞處士計聞官調役則民愈困畫策以喻鄉人履田出貲不月工完其惠利甚博以義復里社之祠便祈謝而淫祀佛老一屏絕之里貧病無告者拯之視其力而材良行修之士必倡延之為里塾師晚築室端居取庭

草不除晚山相對之義自號翠環居士士夫間亦因以名焉又擇里北大白山麓為生營而以弘治丁未正月五日卒享年六十有六疾革前兩日召諸子付後事神氣不亂配方氏棠源人楚華女嚴正有禮族黨賢之子男四人長即宗次曰名曰益曰滿孫男六人葬以壬子某月某日處士承世德而能不鑿其所稟和易曠達有語輒盡雖無位守而行其鄉者率多長厚之事閭門之內雍而不譁然義不可者未始徇時為之居家奉身一



以廉儉非舉祀接大賓衣不兼食不重諸子奉訓率其  
行無改亦可謂履順守正之君子矣嗚呼使一鄉之間  
得胡處士者一二為之表則烏有不能返淳樸之俗以  
復於先世之舊觀者哉而今已矣可不銘諸銘曰  
孰覲其光弗之慎兮孰睨其時弗之徇兮有歸其全業  
之振兮有昌其人澤之浚兮

溪東孫處士及其配吳孺人墓誌銘

溪東孫處士彥正捐館之三十二年其配吳孺人始告

終其子玄璋將以弘治壬子冬十月二十四日合窆於  
白雲樓之先塋前期奉故汧口程隱氏與今藏溪汪琳  
氏二狀來請所以昭其幽者予素善玄璋而隱琳之狀  
亦核可徵也乃序而銘焉序曰處士諱存德其字彥正  
世居徽之休寧曾大父希全大父宗惠父士陽皆以德  
履重其鄉母隆阜戴氏生三子英德京德處士其季也  
士陽父卒年未四十有母在堂而英京亦早世處士能  
以孤子起家孝事其兩世無違志居間即延師講學鳴

琴不伍於俗而以三省名其軒志懇業成比之士陽甫  
存日不替益盛矣處士風儀峻整重然諾惇行義正統  
中郡舉大家實京師處士當行即走行在所上言母老  
缺侍狀獲釋歸歸益刻意於善嘗值歲侵贍其世父用  
規發粟四百碩賑饑而中任之以是用規得如令受冠  
服之榮處士亦自是於貧者必隨其力所及歲賙之粟  
負逋而弗克償者焚其券英德死有女笄然處士子之  
及笄擇嫁剡溪吳士元溪東孔道行者無所憇亭其渡

口以濟困賜族孤孱而摧於橫逆者必振之使有立至  
於拓先基表先壠尤憐憐奉其責而不以自逭也鄉先  
達尚書楊公侍郎吳公都憲程公亟稱其為人而與之  
納交焉吳孺人出邑之臨溪叔祥君女也佐處士有禮  
尤善以勤儉持其家而孝敬慈淑與處士相高奉孀嫂  
甚謹晚失壯子而為處士置側室仰氏汪氏如娣姒遂  
相繼有子親教育之成而處士不及見也孺人年益高  
主家益健其行至於弱者慕暴者馴一時名宗率自以

為弗及處士生永樂壬辰九月十一日卒天順辛巳六月十六日得年五十孺人生永樂癸巳五月十八日卒弘治壬子四月十四日得年八十子男三人長世美早逝次即玄璋也今長區賦次玄玘女四人長適歙邵村張禎次適同里率東程昂次適歙溪南吳道榮次適戴岩大母之族也孫男二人長實次寓孫女四人俱未行曾孫女一人尚幼予觀郡乘謂新安地斗僻而風氣完故前代鼎族多以避難來居苗裔相承守其祠墓奉訓

弗墜殆不誣哉蓋孫氏譜以為江東諸公子之後至唐  
曰金吾公萬登始居休寧之黎陽七傳曰大公遷坑口  
又五傳曰子厚遷草市至諱宏父者當宋季來居溪東  
生安卿則希侔之父也吳氏譜以為漢番君之後至唐  
曰侍御公少微暨其子中舍君輦俱以文名輦七傳曰  
琇仕宋為休寧令生五子分居邑臨溪諸處蓋叔祥之  
所自出者也若處士孺人之賢與玄璋兄弟之克肖法  
宜書而予又歸重其先世者所以進其後之人俾圖無

忝也銘曰

有焯一士淑行在躬允孝且友業充譽隆碩人相之無  
靡無妒子也克承職是之故膺膺高原白雲之鄉有卜  
其傍雙玉偕藏大江東馳番水西注瞻斯敬斯維後之  
裕

休寧儒學生程公昭墓誌銘

予於諸族中子弟特才公昭而公昭以叔父事予亦謹  
予北上之明年忽以公昭訃告為之扼腕不懌者累日

又七年南歸過率溪書院其子法出遺像示予宛然公  
昭殆不忍觀也法泣言塚上之石未有銘敢拜以請會  
予疾不能執筆久之公昭族弟曾從予學數以為言乃  
序而銘之序曰率溪諸程與予同出陳將軍忠壯公至  
公昭為三十有五世矣公昭貌癯性介在童稚即錚錚  
若成人長老異之曰後有炳然振吾族者將在是子乎  
因名之燿字公昭公昭讀書家塾日開警於經傳不必  
成誦而講說敷繹悉中理稍長里中少年率師之其舅



氏汪世行令君語其父鎬曰耀也懋是不可但已宜勗之成會世行往宰醴陵挈與居以是學益邃事益核歸被選為儒學生未幾諸同舍者多遜其業精專至於事可不行尼亦恃以決婁侍御克讓董學政南畿於休寧亦進公昭俾與秋試不偶而汪令君改莅新昌公昭復侍行令君每喜從宿儒問政得失於是公昭獲往見張太史廷祥彭狀元敷五兩人亦皆器公昭曰佳士公昭負識見卓卓不苟尤篤行義事父母能養志與兄炫及

弟焰一不失矩度父喪極哀屏去浮屠法不用祖墓敘  
於歛江氏毅然與兄協力懇官必直之乃已予嘗會遠  
近族人作統宗譜公昭與焉凡有所考誤正譌率先意  
與予合在新昌又佐汪令君作縣志蒐獵纂次亦秩然  
可觀後竟以積思苦學得孱疾不可起公昭曾大父敏  
大父玩與其父三世皆有名里中母汪氏令君之姊也  
公昭生正統戊辰四月六日卒成化乙巳閏四月十三  
日得年三十有八娶里之吳氏子男三長法次儀次湜

湜不育女二長靜適里人吳遷次止尚幼法等以弘治辛亥十一月二十有四日奉葬所居西園負乙面卒於是公昭之卒八易寒暑矣悲夫銘曰

九仞垂成忽告圯千里風馳蹶而止猗嗟若人適類是命兮奈何妥於此

處士李公墓誌銘

高邑李公之治徽州也恒以其父處士春秋高不獲迎養為歎士夫間為作公餘愛日詩慰解之少間將上其

績於朝計取道可歸省而部使者以郡事委君留不遣  
先尚書襄毅公夫人之喪又檄督葬事弘治丙辰春正  
月竟得處士之訃君號慟累日命其子來休寧請曰珍  
不佞幼見知襄毅公且莅卹典於茲未即工而去有遺  
憾焉惟是門下之義甚久敢以銘託予發書歎曰嗚呼  
君之用情猶我也是何可辭按其所自狀李氏世居真  
定高邑曾大父德甫大父安國初嘗有仕籍坐謫戍遼  
東廣寧之左屯家焉父榮娶於梁生處士蓋永樂戊子

歲九月二十五日也處士諱鑑字克明性淳樸孝友雖處行間早失怙而執禮讓喜儒雅不失故宦家矩度時當家難之後或邀之為賈人走四方以自殖者處士謝曰商務華農務實吾寧甘畎畝以貽後之安爾由是竭力服田以奉母生盡養沒盡哀又撫其弟銘為之娶節緒浮費家用漸饒歲時祭燕有常而周窮濟急亦隨其力之所至無恡鄉隣翕然稱之處士見珍有偉質恒語人曰是當起吾家者遣從師授學底於成邊吏嘉歎以

處士為賢處士卒弘治乙卯歲十一月九日享壽八十  
有八娶侯氏有淑德年五十九先處士卒繼俞氏亦克  
相夫子男三人珍璉璠珍舉成化丁未進士授徽州府  
推官有治績璉以功長五十夫侯出璠俞出孫男七曰  
來鴻來鳳來鵬來鶚珍之子曰芳華璡璉之子鳳鵬鶚  
皆都司儒學生女四長適廣寧左屯衛指揮周徵男輔  
次許適浙江按察司副使文貴男三省次許適正千戶  
果俊男某次在室珍歸將奉處士葬城西五里許錦川

先塋以侯祔焉予觀趙郡李氏在唐族極盛贊皇文獻公趙國忠懿公父子與其孫衛公三葉相唐而高邑族素立名在循吏傳胤嗣多賢宦業不乏今其世遠矣而處士實出高邑又得郡推為之子意天於善人之久誄者將振之也然則紹先烈以上及其父俾褒卹之恩賁泉壤而增輝於家乘不有待於異日哉銘曰

維趙李氏積深慶崇孰危其先浮海而東履屯向亨有淑一士膺壽孔多亦顯其子身雖往矣不亡者存溯原

有需赫其貶恩西城錦川中作華表玄堂刻文永妥斯  
兆

沙溪處士汪君墓誌銘

郡學生汪祚奉其大父處士君之命來從予學於休寧  
南山中踰年予往報君歛西沙溪上時君已抱疾不能  
興命祚禮予於堂因宿焉明日祚道予徧視其所居曰  
此為稼同以斂穀此為靜樂以佚老此為三益則家塾  
在焉皆我大父之所力營而貽後人者也又出履其所



居之東曰此為忠烈行祠以奉先世祖越國公此為宗德祠以奉本支祖司農府君以下皆我大父合族人而為之垂成者也還坐堂中則又手一帙以前曰此為崇孝編以紀先世之文獻亦皆我大父之所裒輯而將刻梓以傳者也予因憮然曰賢哉汪君惜不獲識其顏面何如人顧其所立有如此者嘉歎久之乃去去未幾而君果以不起聞時弘治壬子冬十一月十有四日也予既遣奠君而祔來以銘見託會予有召命不及為乃使

人尾舟相候始克序而銘之君諱慶宗字宗裕曾祖俊  
德祖子原父貴新母棠越鮑家女生君性孝友不羣策  
者以為是真能裕其宗邪居父喪一用朱氏禮比葬或  
上其僭於官巡撫侍郎周文襄公曰此禮也烏得謂之  
僭哉抵告者罪一庶妹失愛於父君厚其裝遣之與二  
姊同御其家最嚴對妻子未嘗見齒至與鄉族則甚和  
而亦不苟徇也社壇稅為鄭氏專必均之乃已又嘗言  
縣官新安地多山而瘠請五穀之外藝桑棗以自給縣

官是其言為下令民獲利至今君自處最儉而好施予  
代人官征而不責人之私負以急告者必周之於士尤  
篤寓秀水日有胡英林鳳二生才而貧君數資之遂相  
繼舉進士先墓上下二十世悉植木伐石為表墳菴田  
效於異姓者倡弟勲於朝而復之歲與族人四會食序  
昭穆子孫族姓多聚教館中從子濬瀛相繼領鄉薦而  
祚亦負志力學有可冀以成者君不及見也沙溪之汪  
出越國公第四子之後居歛之唐模十一世祖叔詹宋

崇寧丙戌進士歷官司農少卿以忤秦檜不大顯司農  
生若海直秘閣別居古城山史有傳若海生常州倅擇  
善擇善生建寧察判時中察判生貢元起莘起莘生人  
鑑始居沙溪俊德之祖也貢元當宋季嘗傾家資與止  
屠城之師而俊德受業鄭師山先生師山死國時以孤  
託之蓋累世以節行聞宜君之所立如此也君卒年八  
十有一配溪南吳氏持家有法族黨稱其賢年六十有  
九先君卒子男二長隆孫亦先君卒次佑孫女四長勝

貞適潭渡黃齡次松貞適溪南吳猷次柏貞適攸縣知  
縣江昌次堅貞適竦塘黃迦孫男五長道祚次道彰次  
道充次道芳次道齊道祚易名祚道彰易名魯並為郡  
學生孫女三曾孫女六墓在古城山祖塋之右初越國  
故廟在歛雲嵐山婺源裔孫元帥同當勝國時捐田奉  
祀甚盛廟祝沈氏冒姓而有其田君合族人言之官不  
報則移書婺源諸汪若今成都太守奎山東憲副進大  
理副堅江西僉憲舜民言激切動人諸汪義之乃以委

元帥嗣孫宗紹主其事經二十年不決而君佐之益堅  
事卒白人以是奇君而婺源諸汪皆予姻家也故知君  
實詳而銘不可辭銘曰

沙溪之汪出宋司農湖厥淵源越公之宗數百年來有  
啟有續迨處士君志彼前躅蹈義秉禮卓乎不羣貴弗  
在爵學弗在文其貴以天維德與齒其學以身有徵孫  
子古城山麓蔚爾塋園君復何憾式全其歸有道之碑  
克副者少鄉評既公嗣有褒表

故唐孝子黃府君祠堂碑銘

歛潭渡黃氏以成化乙酉歲建其遠祖唐孝子府君祠於里第之東每歲正元日子孫進謁禮成長幼以次拜起序飲而退二仲之望族長率子孫之勝冠者舉祀禮焉飲福受脰具有規約而所費則出於先世贍塋之田行之餘三十年矣府君裔孫今兵部職方主事華始具首末請書其麗牲之石走觀唐書孝友傳總序以孝獲旌典者二十九人府君與名而莫詳其事蓋州邑未嘗

以其平生履行上史官也走乃為考郡乘參家牒旁蒐傳記而書之曰府君諱尚本江夏之族自祁門左田來居歛西九里之屯村後值盜起黃之族人集眾屯此以捍鄉井乃更號黃屯府君曾祖諱璋祖諱亮父諱光母程氏生府君而卒繼母洪氏實長育之府君天性純至奉親以孝聞建中初洪氏抱疾危甚醫不奏功府君剖股肉作羹以進疾隨愈父卒號泣晝夜不絕聲遂廬墓終身芝產十四本木連理者四遠近嗟異以為孝感刺



史盧公上其事得旌表門閭蓋貞元十九年也府君生  
以上元庚子三月七日卒以太和辛亥十月十三日享  
壽七十有二葬歛之向杲寺西配程氏子三人曰文瓚  
文炳文德巢賊之亂自黃屯徙溪北居之賊重其孝行  
遣人慰諭下令毋犯其家號潭渡黃氏迄今幾八百年  
子孫不下數百人勤生力學衣冠褒偉見之者曰此孝  
子之後也府君葬處更代既遠地荒草寒而往來者率  
相指曰此孝子之墓也噫府君何修而得此於當時後

世哉一好德之心同爾自后王降德之典廢孔曾授受  
僅筆之書誠以為世無悖德悖禮之人斯化行而治可  
成也使唐之季在位者知孝則事君必忠莅官必敬任  
文無所售其術牛李無所成其比宦寺方鎮無所騁其  
惡順德舉而犯上作亂之事泯矣惜乎其以孝稱若府  
君者多出於遠外農畝之間其盛至於感鬼神格草木  
化强暴上之人亦未始不作興之而終無補於治也昔  
朱子守南康下車即詢唐孝子熊仁瞻之墓宅為文奠

之禁其樵采又言之朝請復旌門如舊大賢君子之急  
先務蓋如此府君之名實與仁瞻並列安知他日無良  
有司者取法朱子追表其門與祠相高感動其民人以  
興於行而副我列聖孝理天下之意哉走既序其事補  
舊史之闕且為銘以系之銘曰

允顯新安環山帶川自昔炳靈篤生材賢唐三百年名  
著國史有歛一人曰黃孝子惟是孝子至性天成善事  
其親顙顙厥誠早哀失恃鞠于繼母母疾莫救樂封其

股作羹以進母疾獲痊茲匪人力實監於天父沒悲號  
夜以繼日廬此墓左終身不釋有樹連理有芝競芳乎  
彼草木匪孝何祥里人驚慙孰克致養流聞刺史頓首  
言狀當宁曰嘻孝哉若人往旌其門式降恩綸棹楔巍  
巍見者傾竦褒顯一人列邑風動閭世既久居然墓林  
樵蘇自戢盜弗敢侵矧是錫類有蕃孫子潭渡來居亦  
數千指故宅之東爰作新堂合其宗人以奉蒸嘗鐘鼓  
有嚴豆籩夙戒孝子來享生氣如在孰非人子孰無是

心觀感擴充匪古斯今惟皇撫運克篤孝理虞周化成  
圻內伊始有美嗣人或奮於朝或成於家孝澤孔昭我  
作銘詩勒之貞石勗哉孝孫永保無極

孫君以寬墓誌銘

新安孫氏在休寧者以雷溪為望至諱忠原者贅汧口  
程氏而居焉至以寬君再世矣於是又有汧口孫氏口  
分世業殆與雷溪相高非似續者之有人而能耶以寬  
其字也諱存仁性淳樸善事其父母其父曰岐隱翁母

曰富溪程氏皆愛賢君曰孟當益興吾宗翁之季曰雲  
隱處士富學問昌於詩君從之游而親年高有弟七人  
闔門男女百口日給孔艱君慨然曰學不可終遂矣與  
諸弟謀幹蠱曰某之吳某之粵協乃心力無敢異議居  
數歲家果益興如親言君既致大阜思所以維之者乃  
立條約不私畜不析產婚喪祭燕泉布出納比閭閻慶  
弔還往周恤假貸悉按古禮度可行者為之節且延師  
儒訓子姓躬督教之由是汊口人稱家政之善者必曰

孫氏君又將建先祠訂宗法如浦陽鄭氏而疾作不果  
為之君曾大父諱興大父即始居汭口者岐隱翁諱春  
殷別有傳君配亦出程氏壺範相承賢淑有聞君平生  
好簡逸惡侈靡乃獨愛鞠藝而玩之不數因以菊窻自  
名卒成化壬辰歲九月十九日得年四十有二丈夫子  
三廷傑廷弼廷式女子一適程永浩孫男子二友進友  
緣孫女子三以甲午歲正月十一日卜葬里之白楊塢  
二十四年矣廷式始以君表弟正思之狀來請銘汭口

富溪之程與予皆同所自出且聞廷式兄弟與其諸房  
守君之家規弗替至今然則君豈直一鄉之彥而已是  
宜銘銘曰

無咎承考孰悖之畏念鞠子哀孰盥之愧有堂構美亦  
學友于肅彼家規莫之敢渝繫若人兮胡弗壽豈月旦  
有言不亡者在黃花采采白楊蕭蕭最行勒銘惟後之  
昭

處安汪翁墓誌銘



欽稠墅汪翁以成化壬寅四月十五日卒于家其子泰  
護屬其姻家儒學生程陽奉狀來請於休寧值予方以  
服闋介行李將入朝辭之而陽於予為族孫請甚堅乃  
不克辭而序之曰欽西諸汪皆唐越公之後而稠墅之  
望彌著其先在宋有諱應元者事理宗至提刑予嘗得  
其論役法狀而讀之事核文簡有憂國活民之情又嘗  
得吾宗丞相文清公所為誌銘而知履行之詳審其為  
一時名流不誣也公之族甚蕃而阨於元季之兵燹至

翁之大考國佐始出而振之考士美又克繼之遂長一區之賦有名鄉曲間士美君三子翁最少而性淳慤與二兄繼長區賦能不墮其父業二兄繼殞諸子尚幼君益自刻厲以亢宗植家為已責上奉其父下撫其子盡心力無違禮又推其所有以應公家而惠其隣里嫺戚宗黨之不給者由是義聲熒然起一時一時競者以平暴者以歛教其二子讀書敦行如已志二子者奉訓唯謹君因自號處安翁以家事付之而自適於溪山觴詠

間不復關世慮杖屨所至人必以為榮卒年八十配江氏卒成化壬辰九月二十六日年七十五與翁合兆子男二長泰護次泰常女二長適常樾鮑泰次適向杲吳槿茂孫男三長元俊次元傑次元傳孫女二長適胡某次適吳某曾孫男二長璜次璉墓在里之鰍塢原翁諱敦慶字文厚其羣行若此嗚呼其亦無忝於文獻之族而法不可以不銘者乎銘曰

一鄉善士衆所推賢者以勸愚者規成此下俗淳弗漓

處士汪翁宿且耆孳孳好義老不衰遠膺福履百歲宜  
今其已矣寧不悲盛德之後嗣者誰子孫誥誥慶所遺  
猷竭之原山水奇我銘敢比林宗碑

資德大夫正治上卿掌通政使司事太子少保  
禮部尚書致仕張公墓誌銘

弘治癸丑夏四月二十有六日掌通政使司事太子少  
保禮部尚書致仕張公卒於京師之第計聞詔遣官諭  
祭其家仍命有司為營兆域如禮於是公之子兵部車

駕郎中忱將奉柩歸其鄉前期以翰林編修白君鉞之  
狀來請銘謹按公諱文質字允中世居永平昌黎相傳  
其七世祖勗嘗仕元為翰林學士承旨至公之曾祖曰  
繼和祖曰廣考曰鑑而廣嘗仕為山西繁峙縣沙澗驛  
丞兩世以公貴並贈資政大夫工部尚書祖妣王氏贈  
夫人妣楊氏封太夫人始公父侍學于沙澗早卒遺腹  
得公賴王夫人親抱育之少長遣入縣學為生員公茹  
悲苦不堪而刻意問學期自立以亢其宗正統辛酉遂

舉京闈鄉試第二人明年登進士第授工科給事中值  
己巳之變中外多事公與同列屢進讜言以輔政而公  
體質凝遠音吐鴻鬯尤為一時所器重景泰庚午陞都  
給事中壬申陞通政使司右參議英宗復位初廷臣多  
不當意者獨嘉公陞左通政進通政使數被賞賚憲宗  
嗣位久之以考績陞兵部左侍郎成化乙未進工部尚  
書並掌通政事今上正位東宮加恩廷臣公太子少保  
明年調禮部尚書莅部事尋以母憂去職服闋仍掌通

政事會同官有以左道進者謀奪公位公覺之遂引疾去蓋家居凡七年及見左道者之敗而公等被陰嫉者或起用於時或令終於家然後論者知天道之不爽如此公為人謹厚雅度有容終日恂恂不妄言笑典出納前後餘四十年每朝廷有大政刑必預議有大典禮必在列公亦感列聖眷知夙夜奉公思以濟時澤物而局於官守不克自見然其存心制行不苟為異同以趨時好望而知為福人君子也性孝友每思王夫人恩薦享

之日或哽涕不已至有官始克迎楊夫人以歸奉養備  
至待異父弟妹無間言於故舊鄉黨無論戚疏貴賤在  
困中者極力拯之必濟乃已公享年七十有三娶王氏  
贈夫人繼張氏封夫人子男三長忱已丑進士即郎中  
君也次慥鄉貢進士次懷太學生皆王夫人出而慥懷  
先卒孫男二長葵太學生次蘭女五曾孫男女各一公  
墓在邑西會東社之原惟先尚書襄毅公與公同年進  
士而友相得故走獲以童子親几席聽教言中歲去國



不及拜公幸茲還朝則公已捐館嗚呼先友盡矣忍不  
以銘而才謏文陋不足以發公行治之詳誼在通家又  
不敢讓則次其事而銘之銘曰

惟天降材亦難其成惟器之碩斯用之宏緊若張公自  
其有祿鉅人元夫占者屬目一仕青瑣再官銀臺封駁  
之績對敎之才進位文昌載加宮保竭厯效忠屢閱勲  
考英皇景帝暨我憲宗嘉此老成恩崇譽隆公事三朝  
一節敬慎守厥攸司弗究其蘊人謂公器福祿孔宜彼

儉讒兮嫉而尼之褒賢殛頑天道甚邇公雖云亡何憾  
于彼營墳有使諭奠有文哀榮始終無愧前聞會東之  
原有妥玄室貞珉勒辭百世無斁

驃騎將軍右軍都督府都督僉事李公墓誌銘

公諱景字明遠其先起西陲自宋元來世有西寧之地  
至公祖南哥當國朝混一初首率衆內附太祖高皇帝  
嘉其誠俾同知西寧州歷官西寧衛指揮僉事父英嗣  
其官事太宗文皇帝屢從征伐以功封奉天翊衛宣力

武臣特進榮祿大夫柱國會寧伯母夏氏封會寧伯夫人初會寧公為將有威名坐累失爵而卒公年甫十二母夫人上書懇其功英宗睿皇帝惻然念之授錦衣衛指揮同知未幾有詔錄勲臣後復進都指揮使憲宗純皇帝即位之又明年舉將才尚書姚文敏公以公名上進左軍都督府署都督僉事分練五軍營尋用兵部言莅右軍都督府事是歲秋大閱立團營十二又領振威營公久在散地一日被廷薦受簡知於士馬訓習戎務

張弛殫厥心力聲稱翕然庚寅歲祲畿內盜起詔侍郎  
葉文莊公及公等三人往綏輯之癸巳監修禁城己亥  
督治盧溝河決而山後以回祿變告勢及四陵復詔公  
發旁近兵撲之公每受命寢食不遑務竣事乃已而先  
帝亦賜賚優渥同官者不及也庚子中貴人汪直來監  
十二營奏罷公仍分練左掖軍又用中貴人張敏言罷  
之而尚書余忠肅公言公可用乃分練神機營公上疏  
請罷不許乙巳請告展墓許之公至西寧治別墅自號

松巖拙叟思終老焉逾年不至詔兵部檄陝西守臣促公始入朝今上皇帝嗣位初再上疏請罷亦不許壬子用建儲恩實授都督僉事而公已抱疾不可出矣癸丑夏五月十五日卒於正寢計聞上悼惜賜棺槨齋糧麻布遣官諭祭者再凡一切葬事悉從官給臨壙暮年及再暮詔亦遣使祭焉公為人雋悟沉著喜讀書尤工筆札所交一時名人誓必嗣其先烈而遭時承平不克自見結佐五府典列營三十年自壯至老持已矜嚴守官

決定四車全書

狀來請銘憶當成化初先尚書襄毅公在兵部首舉公而用之故予得數與公還往知其人義不可辭銘曰

西寧黠黠惟陝之藩李氏在州世屬橐鞬允顯貳車首識真主爰錫金緋秩比亞旅有赫代將分茅會寧功高謗興慶衍于庭惟驃騎公世武孔力亦篤詩書安此家食錦衣輝雲崇德昭勲以才受知入佐五軍乃肅戎行乃拯民瘼國有大功亦籍經略歷事三聖勞勤實多進止何心出入逶迤公志未酬公疾弗起有子如林一濟

其美惟皇念舊卹典載頒以窆以奠于彼家山冠劍之  
藏永妥窆窆貞珉勒辭百世無斁

懷遠將軍忠義前衛指揮同知凌公墓誌銘

公諱錦字日章凌姓凌之先蓋出衛康叔康叔支子為  
周凌人以官氏子孫散處江浙間至吳偏將軍都亭侯  
統著名史冊而句容故吳甸也句容之凌相傳為統後  
在唐學士準在宋侍郎策各以其地顯公家句容之郭  
干村族亦鉅而失其譜公之祖福海妣田氏考天壽贈



懷遠將軍同知指揮使司事妣白氏贈淑人天壽君當  
永樂初以誼誤戍興州中屯業中圯然獨撫公曰吾所  
為無愧心者將恃爾以亢吾宗無自棄也公受命感奮  
必思以自効宣德初代父軍中騎射之餘時從儒者問  
書史大義而於一切世態俯仰宦跡通滯物貨奇贏悉  
鉤探其情勢而欲手操之蓋公性沉鷖有衎長身偉髯  
慕古策士亦每以策干時名公卿諸公亦多折節與還  
往正統中從大將軍擣敵于甘州烏嚕乃歸以功長伍

什夫上言興州官軍當分番宿衛而地遠外非便兵部  
是之得旨許內徙隸忠義前衛己巳秋敵大入寇京城  
戒嚴公從副將軍戰敵彰義門又追敵紫荆關以功試  
百戶景泰初貴州苗作亂公在行破其香爐山諸寨進  
副千戶金齒守將知其能請隨以自輔天順元年正月  
以遞奏入京預迎英廟復位進指揮同知食祿錦衣衛  
英廟亦識其人數有賜賚詔乘傳取馴象於雲南還奏  
稱旨久之曹石擅政陷文臣典兵者公坐與善調涼州

明年與邊將出禦敵敗之功未上值英廟燕間忽思公問所在左右曰在涼州即日召之時方革迎駕功進者兵部俟公至上劾英廟曰非也其仍舊職不問公感上知遇脫險即夷遂獻其名馬廷謝不復出以老疾自免日與方外者遊而於世故亦未始相忘聞朝政闕失暨邊報民瘼與客亶亶說不倦自號無默子放遊江東西淮海間自豪於賈人十餘年乃還買西山田三千畝以濟饑捐地以瘞貧死者千計築大第作土室壘山種樹

日坐卧其中雖事聲色而所食無珍味所服不過唐巾  
弊衣自以為得異人授金丹至訣恒自悶不以告人也  
又時操觚著書以仙自命雖見哂不恤弘治壬子二月  
二十四日忽得疾不起享年七十有九配楊處士舜之  
女協公起家勤儉孝睦親黨稱之先公十六年卒贈淑  
人公子男二長雲漢今懷遠將軍指揮同知婦曰程先  
少保尚書襄毅公之女予弟也封淑人次雲衢後公八  
月卒婦曰陳陝西按察僉事峻之女公女四長適參將

都指揮魏啟次適錦衣百戶子吳純次適錦衣千戶趙  
良次適錦衣指揮子葉順孫女一公長子暨兩長女楊  
出餘多出側室雲漢將以癸丑八月廿二日奉公葬都  
城之東南平屯塢前期勾予銘予與公雖至戚而情不  
比間有違言亦不為忤蓋公晚而知予其屬壙之言亦  
憐憐任予嗚呼悲夫若公亦豈非行間之表表不可多  
得者歟銘之可也銘曰

惟凌之先材武有聞肅肅亭侯世遠而分粵懷遠公其

智孔邃業亨宦成弗繫世類金帶緋衣出彼秦鞵角巾  
草屨跡近超煩豈句容人多慕先老企永厥年孰振其  
槁亦既有年有女有男如公得斯當斃而甘爰歸一坵  
平屯之塢我弗辭銘俾顯終古

汪承之墓誌銘

承之佐予編刻新安文獻志於南山堂役鉅而弗克就  
緒也上書郡侯言是不宜獨勞郡侯韙其言即日下屬  
縣協力竣事而承之躬校讐訪遺闕雖抱疾或往反冒

雨雪不自惜一日請歸言動安好不知其有疾也又數  
日以疾革告予大駭亟命壘子往視而承之說後事疊  
疊不亂已乃泣下曰吾不能副先生之教矣竟不起時  
弘治丙辰十二月廿七日年甫四十爾嗚呼悲夫承之  
諱祚歛沙溪汪也新安諸汪皆祖唐越公而沙溪有宋  
司農少卿叔詹及其子直秘閣若海族益顯承之距若  
海十二世詳見予所銘其祖墓云承之少失母吳氏壯  
失父隆孫君雖孱多疾而英豪材敏負大志必有以自

見入郡庠治小戴記從學方太守進又之越從學毛僉  
事憲為經義豐蔚可觀而旁治諸經史子傳參究博極  
至廢寢食積書萬卷猶不以自足前後經四提學御史  
每試必進之歲乙卯試郡庠第一上南畿有媚之者中  
以飛語竟不獲薦承之從予遊將十年其為人動必慕  
古居親喪過哀至嘔血成痼疾奉繼母如生已者撫繼  
出弟妹極友愛事叔父崇禮君甚謹事必咨而行長子  
冠用朱氏禮以倡俗又刻予所編心經附注以傳曰此



聖學之基也承之娶方氏生二子恂恪三女岩音兆音魁音治命以其季歸予族姪曾之子從進曰吾與曾友善毋食吾言承之所著詩文有寶經堂稿若干卷又輯其先世遺文為崇孝編若干卷恂以其從叔儒學生魯之狀來乞銘噫承之已矣予尚忍為之銘墓也哉銘曰天胡降材弗成而裁士立孔卓乃毀于璞繫命則然孰天孰年全歸若子亦曰不死

恭人鄭氏墓誌銘

恭人鄭氏諱玉香世居淮安宿遷為故太保吏部尚書  
鹽山王忠肅公之冢婦今錦衣指揮矜之室初恭人之  
考君曰文宣德中為典史鹽山而忠肅公以都憲出撫  
江浙川陝無寧歲君之配曰韓孺人每上謁太夫人宋  
氏於里第必攜恭人與俱時恭人年五六歲端淑如成  
人太夫人奇愛之將聘為婦以書告忠肅公公曰吾方  
受命於外王事孔殷不及顧此也惟夫人主宜無不可  
會君以績最陞吏目定州而忠肅公還朝又未幾而君

以老得休致由是不相聞數年忠肅公念無以致婦者  
以書託其友南京都憲張公純值張公有事入覲盡室  
行至宿遷代之舉納徵禮而挈恭人歸王氏當是時忠  
肅公再出視師遼東錦衣君實侍行在邊十餘年恭人  
能盡婦職奉公姑甚謹又每以忠孝勉錦衣君甚力久  
之忠肅公復視師二廣錦衣君以入國學留京師恭人  
年益壯內政益修暨忠肅公以耆德總百僚英廟念其  
功錄錦衣君千戶而恭人所以事其舅佐其夫者不以

大貴顯而小或肆也忠肅公既沒錦衣君寢嚮用而子女日亦盛恭人治家一如忠肅時由是錦衣君賢聲日著子有娶女有歸一時公卿家率自以為不及恭人之生以宣德己酉正月十五日其卒以弘治癸丑九月二十五日享年六十有五子男二長宣武學生先卒次隣中軍都督府經歷女長適天津左衛指揮黃溥次適國學生楊鏜孫男二長允恭亦先卒次承宗女五長適馬溥次適錦衣千戶韋綱次適錦衣指揮張禹之子其次

適錦衣千戶趙輓之子其次適騰驤衛指揮夏銘之子  
隣等將奉柩歸以卒之歲十一月十一日葬鹽山之太  
平鄉安都里毛兒園祖塋之次前期以鴻臚高君岱之  
狀來請銘走家亦出河間幼承忠肅公誨顧而獲與錦  
衣君還往聞恭人之内行甚悉不敢以鄙樸辭也銘曰  
維宰忠肅立朝桓桓家規孔嚴為婦實難有鄭之媛配  
公之子賢不以忤敬不以弛名與德嫔是曰恭人胡弗  
永年遽韜其真紀行刻銘新壠故地世澤之長閭範之

懿

指揮魏君墓誌銘

君諱啟字景初姓魏氏世居邳之睢寧曾祖興國初以材武隸東平侯軍中為隊長祖真佐太宗入靖難歷官寧夏指揮僉事父政嗣其職累用戰功至都指揮同知母王氏封夫人君生世將家雖嫻武事而喜讀書親賢樂善無紈綺之習成化初以舍人從襄城伯出討川貴夷之梗化者拳勇智畧已駸駸有名於幕府時同知公

已老兵部請以君代長其軍為濟州衛指揮使會昌侯  
在五軍奏用之俾總練士於中軍廷議建團營十二營  
以定襄伯督之君獲總練士於振威營久之復用保國  
公奏以君居十二營中軍主宣令於下將吏皆服君舉  
錯之宜而凡前後總戎者亦皆才君不自釋會河南汝  
寧盜起劫府庫殺長吏兵部薦君可獨任詔進署都指  
揮僉事奉璽書往守其地君至申號令閱軍實籍民兵  
捕劇賊而鎮之以靜一境晏然弘治初用薦充右參將

將移守蜀之松潘以恩詔實授都指揮僉事時龍溪寨  
番酋雨東數出為邊患君設伏三處而自督官軍往迎  
之馘其徒三百人雨東敗走居人始安而議者以君招  
繫詔落三職還京師兵民皆為不平而君怡然不自辨  
歸舟抵通州值大疫遂卧疾不起時弘治癸丑閏五月  
十五日也得年五十有七配凌氏忠義前衛指揮同知  
錦之女封淑人子男二人長曰瑞嗣為濟州衛指揮使  
次曰瓚女二人俱在室孫男三人長曰江次曰淮次曰



湘孫女一人君弟昇及瑄等將奉君柩以是年七月十四日葬都城西白芷坊之原負壬向丙前期來請予銘予女弟適錦之子雲漢故於君連姻往還相好也今歲予被召北上君方西還相遇於淮而予舟先發蓋抵京未一月得君訃為之驚悼不能已已銘豈可辭哉銘曰精悍之資通練之譽如駿斯馳乃蹶其御有餘福祉維後之留我銘昭哉聿寧斯丘

中奉大夫宗人府儀賓郭公墓誌銘

公諱巖字景瞻姓郭氏世為漢中南鄭人曾祖考文通  
元季以功封隋國公祖考雲歷官湖廣行中書省平章  
政事國初內附太祖高皇帝嘉其誠授宣武將軍南陽  
衛指揮使考溟復以功進榮祿大夫後軍都督府都督  
公三子其長曰崇以都指揮守開平公其季也美姿容  
喜問學觀者策其必大貴時唐定王開國南陽而薨子  
靖王繼立宣德戊申上書言定王有長女未婚詔封魯  
山郡主選可承者得公送京師入見稱旨錫之冠服誥

授中奉大夫宗人府儀賓公生世將家而秉禮執謙納  
交名士未嘗以富貴自侈內外府僚亟稱其賢每歲時  
入賀小心周悉恒以不克將命為懼郡主敬之教諸子  
俱力善向學不為紈綺之習以成化己丑某月某日卒  
於正寢享年六十有四計聞詔遣官諭祭權厝南陽城  
北紫山之原郡主後公一歲生永樂初隨定王之國事  
王及母妃英氏極孝謹習經史通大義連失怙恃哀毀  
盡禮其事舅姑甚執婦道處家肅雍撫諸子愛均無嫡

庶之別勤儉恭慎聞者不意其為貴主也享年八十有  
七以弘治癸丑三月二十五日薨治命喪葬悉用朱子  
家禮朝廷得王奏為製銘旌遣官諭祭者四仍勅有司  
為營墓園俾合葬焉公子男三人曰顏先卒曰顥曰順  
女四人其婿曰指揮芮凱百戶丁廣千戶弟何達閭惠  
孫男六人曰脩曰俊曰仁曰仲曰伸曰傑女四人其婿  
曰國學生鹿藝郡學生朱鳳百戶弟顧德指揮弟邢潮  
曾孫男若干人女若干人公之先與予皆聯姻故閭老

贈太師李文達公家成化初文達公子今太常少卿士  
欽共辱過予時公已蒼顏髮斑白矣然語笑竟日猶雋  
爽可親不覺其老也別去不相聞二十年乃見顯京師  
知公久下世為之泣然而顯不鄙以銘見屬辭再三不  
獲則據其所自述者次第如右惟我列聖御家垂範之  
懿既久且深故化及宗藩慎終以禮若是是亦可銘銘  
曰

有偉公族作賓王門履善弗愆荷天之恩維宗媛兮復

受多祉既昌厥齡亦引其嗣生也偕貴歿焉同藏有褒  
鳳冊有愍龍章帝命作丘紫山之麓玄金刻銘百世斯

卜

石丘處士吳君墓碑銘

弘治甲寅春予被命教庶吉士於翰林時山陰吳薌年  
最少最執禮嗜學恒竊意其家訓有素也明年春郊享  
齋於公而薌不至云有父喪焉又浹旬乃奉大理丞王  
君鑑之狀來乞請銘曰將載燕石歸刻之其容戚其詞

悲且諗其父之賢不忍辭也諾而書之曰君諱琢字文器世居山陰湖桑里為碩宗曾祖慎國初徙居邑西州山祖淵考暉皆不仕而淵嘗入粟濟邊受旌為義民暉故儒者號裕菴妣夏氏生子七人君行六有資質未總角已涉獵諸經史賦詩業文如成人又以餘力作屬對啟蒙一編人爭賞之其事父母極孝母邁疾危湯藥非親嘗不以進送其終無違禮有司屢欲以儒學生進君君固辭曰父老矣願終養也既又奉父隱細山之陽自

號石丘子示終不出獨力備養父稍不樂即長跪曰大人得無以兒不孝故邪或終日不去左右務得其歡乃已吳族千指君事上撫下悉有恩義尤以才識服人族有疑事或持之必待君而決諸兄璇璧早世育其孤若已子貨泉衆帛聽取而自收其敗勘者仲兄玠生女不舉為仇家所誣多畏避君毅然出白其枉父苦下疾數年醫以為非吮不可達君屢達之其卒也悉用朱氏禮又注意郭璞書久而棄去曰墳地好孰若心地好人以



為名言君篤於教子且曰士必以用世為志經律相資不可少也故諸子率謹禮奉法而族人亦以之相戒實君啟之君嘗病風而愈愈五年復作遂不起時弘治甲寅九月十七日得年僅四十有六娶司馬氏溫國文正公之裔子男四人其長舜也次臯次夔次龍舜初名舜舉進士被選入翰林為庶吉士以避古諱請于上更今名孫男一人夢聖孫女一人夢政舜將以某年某月某日奉君葬某鄉某山之原予觀處士羣行皆可書而孝

父事類庾黔婁妻友兄事類薛包至於究堪輿之本合經  
律之宜其所見尤過人而迄不一施又弗逮其子之養  
誠有可悲者然脩短之數人豈能責之乎冥冥不可致  
詰之地哉守官勵行一求為君之光而俟天定於異日  
恩及漏泉名昭無窮則君雖不壽猶壽矣予不及識君  
然於薨有一日之長故書君之事以副其哀思亦將慰  
君於九原也銘曰

木榮而摧驥迅而踣豈伊人為而實氣之忒乎爰

闕三字

亦引其澤將不在厥嗣而孰昭其德乎貞珉岌然我  
銘載勒後千百年過而太息懿哉是惟石丘之宅乎

贈文林郎雲南道監察御史周君暨封太孺人

張氏墓誌銘

周君真諱而仲成字者阜城之隱君子也年僅五十有  
五而卒卒之二十年用其子琰貴受勅贈文林郎監察  
御史其配張氏封太孺人太孺人壽八十有四以就養  
卒于京邸士大夫交識琰者莫不賻相踵且相與嘖嘖嘆

周君之積與太孺人之教有以成其子者如此於是琰將奉柩歸葬以失恃之早墓未有銘奉中書舍人沈君冬魁狀來屬之予予於琰同鄉人交相好為序而銘之序曰周氏之先本居浙黃巖曾大父均禮元季為河間路總管大父本初國朝洪武中始家河間阜城父祐娶王氏生君最謹厚性不嗜酒少從師授書通其大義而於子史喜涉獵與人說亶亶忘倦事父母必得其歡友其弟深務責之成人深果以才自見仕為江夏簿教諸

子不許事豪侈曰人生自耕讀外皆非可業者處友接  
人和而不苟家務人事必審而後應鮮或盪也鄉戚族  
屬後生晚輩視以為法者必曰周處士周處士太孺人  
同邑名家女生有淑行父從義奇愛之擇所歸得周君  
而嫁蓋君平日孝親友弟訓子持家皆太孺人相成之  
力及君早世親督教諸孤而資給之費皆自耕織中出  
人以為難琰起儒學生舉進士擢雲南道監察御史太  
孺人居恒語之曰汝為言官大不可以寵耀自持當畏

慎以不職為懼斯可以光汝祖父矣琰奉訓唯謹凡監  
稅督餉按部皆以勤公著聲而建白時政扶植善類尤  
力論者蓋不以其推榮為難而以其風節顯親為難君  
生永樂庚寅十月十三日卒天順甲申三月二日葬阜  
城坤維先隴之次太孺人生永樂辛卯六月二日卒弘  
治甲寅七月廿七日將祔於君子男三曰瑄曰琰御史  
君也曰璞孫男五曰章曰良輔曰良臣曰良金曰良玉  
孫女一曰長春許聘何磐曾孫男二曰廣集曰迎年曾

孫女一曰妙鸞葬以卒之年某月某日銘曰

代有隱顯貴譽之傳脩短弗齊其偕則賢猗雙璧兮永  
妥于此惟後熒然惟君有子

宋尚書職方郎中兼權中書舍人查公墓表

中世以來號鉅家者保其丘壠至四五傳者鮮矣況十  
有三世之遠哉近祖之履歷行業或不能詳矣況欲表  
之於異代五百年之久哉奉其遺體之弗失顯其遺烈  
而弗忘此修士行而尚古道者所難也若吾邑查君富


興求表其上世職方公之墓非曠世而僅見者哉按其譜查氏世居休寧瑞芝坊自欽徙出唐長史昌之後公諱拱之失其字曾祖文徽南唐工部尚書諡曰宣伯祖元方宋殿中侍御史祖元規贈國子博士父陶秘書少監知審刑院叔父道咸平四年舉制科第一仕至龍圖閣待制子孫遷海陵而秘書居故鄉有子二人公其長也舉淳化三年進士歷官尚書職方郎中兼權中書舍人卒年四十弟慶之自崑山尉授太常太祝而宋史謂



公為都官郎中謂慶之為太子中舍各隨所見書之也  
公墓在休寧北街朱紫巷口距今五百年逮富興則十  
有三世矣公子一人曰翼將作監主簿孫三人曰起寧  
海觀察支使曰沔郊祀齋郎曰樗太廟齋郎其祖之受  
封與其嗣之蔭序譜多失書者而一坏之土託委巷塵  
坭間亦未之有表焉富興以布衣七十之老崛然衆中  
禮以義起既續譜以昭世德又建石墓下請文史氏以  
嚴冠烏之藏是可為執筆而使其無傳哉公之履歷

行業不能悉獨縣志及家乘稱其廉行清節不愧世風  
為錢宣靖冠忠愍所獎重其大致可推見而脩系承傳  
蕃衍碩大仕者有守處者有聞則其餘慶所種亦豈一  
時淺夫自殖而弗計其後者之可及哉昔忠獻韓公僅  
得奉五世祖墓至發壙考銘而後見老泉蘇氏譜其所  
自出高祖以上不可得詳而吾鄉鉅家往往能守其丘  
壠譜牒遠者數十世近亦十數世松楸鬱然昭穆不紊  
合族之禮掃墓之節著於定法比於官府有先正巨公

之所不可致者豈吾鄉僻居東南山中無兵燹之禍而  
其人得以申敬宗收族之義歟然則生其地者安可不  
自幸而敦本力善以為其上世之光歟查氏後人尚知  
所謹哉



篁墩文集卷四十六

欽定四庫全書

集部

篁墩文集卷四十七

詳校官編修<sub>臣</sub>李堯棟

中書<sub>臣</sub>劉源洪覆勘

總校官進士<sub>臣</sub>朱 鈐

校對官監丞<sub>臣</sub>張魯炳

謄錄監生<sub>臣</sub>史殿榮

欽定四庫全書

篁墩文集卷四十七

明程敏政撰

碑誌表

驃騎將軍後軍都督府都督僉事李公墓誌銘  
弘治甲寅夏六月二十有一日後軍都督府都督僉事  
李公卒於家計聞上為之悼惜命禮部諭祭工部營墳  
京府給齋糧麻布如制其子清等將以次年夏四月十  
七日奉葬都城東六里屯之原以予其父執友也前期

請文誌其墓公諱銘字自新世居山東鄒平之醴泉鄉  
曾大父士成贈武畧將軍管軍副千戶妣柴氏贈宜人  
大父子祥以布衣從文廟靖內難授武功中衛副千戶  
父海嗣武成後衛副千戶並以公貴贈驃騎將軍後軍  
都督府都督僉事祖妣劉氏妣邢氏並贈夫人公生四  
歲而孤邢夫人為請世祿挈歸鄒平教育之至正統己  
未始上京師嗣父職時公年踰弱冠即負志侃侃日從  
人習騎射讀書史思亢其宗正統己巳敵入攻都城公

從大將軍拒戰德勝關陞正千戶景泰庚午從追敵於  
大同時白馬城及雷公山敵騎蔽野衆莫敢撓公與偏  
師轉戰不憚至代州復遇敵先登陷陣還論功陞指揮  
僉事居久之用薦莅衛事兼練士於京營以勤恪聞天  
順辛巳秋逆欽犯關勢張甚公時隸五軍急號召所部  
士夜詣總戎者分道與戰衄其黨賊就戮陞指揮同知  
成化丙戌舉將才公在選中陞署指揮使川貴山都掌  
蠻亂久不下朝廷大發兵擊之軍畢節而蜀兵為賊沮

於瀘江不克進公冒險往迎之軍大振復自率一軍入  
搗大穴塘連破之燔其寨數十遂抵大壩大壩者賊巢  
在焉由是諸蠻悉平公勞居多會有妒其功者僅實授  
指揮使己丑夏從西征獨將三千人為前行破敵雙山  
堡又追敗之於開荒川還所掠丁男生口甚衆陞都指  
揮僉事辛卯冬詔充右參將分守燕河營諸處居八年  
進署後軍都督府都督僉事充總兵官鎮薊州永平山  
海諸處薊東北重鎮亭障久多廢不治公歲加修塞剡



峻甃險踰數百里屹成巨防而喜峰口者諾延貢道也  
既入墳山關猶俾露宿殊失柔遠之義公為造大屋三  
十八楹以居敵使又立墩臺垛石垣五百丈以謹防戍  
督民耕邊田采野食以備荒選精卒躬團練之以備戰  
又以其餘力祠名臣以勸有功置戎醫以濟病者一方  
晏然人戴之若父母而公自以年至請罷上知公先朝  
宿將慰留之又五年用建儲恩實授都督僉事賜誥追  
贈二代公復上章懇辭始獲命還京師時弘治士子也

公早失所怙事母夫人極孝謹居喪哀毀嘗請於朝乞  
解官持服不果行性不嗜酒與人恂恂若儒生而御軍  
嚴整不可犯所至有功同時列校號材武者究其歸率  
自以為不及課諸子諄諄以詩書斤紈綺之習是以清  
嘗挾藝較鄉闈弗偶公卒年七十有二配張氏封夫人  
側室王氏子男二長即清今嗣旗手衛指揮使次源女  
三長適揚州衛指揮使程瑄次適梁城所指揮僉事楊  
輝次在室孫女四俱幼憶當正統末少保于肅愍公總

諸軍公時少年已克有立與功名之會成化中從先尚書襄毅公南征在幕府有名晚守薊又與尚書莆田彭公同事彭慎許可獨稱公為作邊政記鑱之石蓋誠一時老成人而今不可復作矣故序其事而系之辭以昭公於無窮辭曰

惟皇御宇長治久安孰使武嬉而缺材官洸洸李公爰起孤子忠勤自將為天子使有寇邦畿有燔宮門分將獵狝遏彼烏孫南靖妖氛西馘戎醜載服金緋公勞孔

有參閭授鉞名尊位崇二十餘年捍國之東羽檄不驚  
邊人按堵公年既高公節良苦鸞書紫泥豹轟牙旗天  
子加念功名來歸胡疾弗瘳殫厥心力有司計聞哀動  
宸極御奠旅旅勅葬我我恩禮始終如公幾何六里之  
屯泉深土厚序勲勒文百世不朽

太恭人強母袁氏墓誌銘

今南京通政司右通政強公在成化中為御史按遼東  
以言事忤權貴人被逮繫謫戍邊時公母太恭人在堂

年七十餘矣士方為公憂而太恭人聞之殊不色動曰  
吾兒能忠於事上若此吾何戚焉即遣人慰諭之曰險  
夷一致無以我為念也弘治初公起副憲山東又召佐  
大理進都憲益侶侶不屈坐是改官南京太恭人老不  
能就養公復上書請歸侍許之蓋抵家獲奉起居一年  
而太恭人捐館年九十矣士論嘖嘖以太恭人享全福  
膺上壽有子若公忠孝具備譽望孔嘉求之一時不多  
見而善慶之積慈訓之懿誠有不可誣焉者矣通政公

以敏政辱在鄉閭有同榜之雅遠以銘見屬謹不敢辭  
則撮其大者如此而序之曰太恭人諱體柔字用巽贈  
中憲大夫通政強公諱繩武之配世居河間滄州生有  
德容性貞一勤女紅知書史大義父勝及母李氏無他  
子鍾愛太恭人擇所歸得中憲而嫁上承下御具有條  
則烹飪蠶桑之事悉身視之不以煩其伯姒泉布出納  
亦不私所有是其昆弟友于無間言遇祀先極恭謹  
雖歉歲亦節約取豐潔乃已念袁氏無嗣每四時必走

哭其二親之墓墓道多狼厄嘗一值之甚殆終不以是  
輟行其力孝如此通政公少有偉質太恭人為擇師授  
學至脫簪珥躬紡績資其成及通政公貴而太恭人猶  
喜樸素厭喧擾却羅綺弗御所居別業雖陋而樂恒諄  
諄以戒其家人曰勤儉兩言豈可忘耶以通政公恩初  
受勅封太孺人再受誥封太恭人卒以弘治甲寅七月  
三十日疾革通政公請所欲言曰吾年九十何憾所願  
汝等始終輯睦無異今日吾目瞑矣距生洪武乙酉七

月十四日子男二長珍成化丙戌進士歷監察御史山東按察副使大理左少卿都察院右僉都御史改今官次瑄女二長適同里胡玲次適天津衛百戶周俊孫男七長汝學次汝欽汝問汝思汝器汝諧汝辯皆業儒孫女三長適府學生馬驄餘未行曾孫男九女四通政公將以十月七日奉太恭人葬於滄州東南五里家園之西南惟敏政晚生不及拜太恭人於堂而獲友通政公聞其德善孔悉故序其事已而系之銘銘曰



孰躋耄耄兼此康寧仁哉恭人享幾百齡慈誨有徵忠  
孝無滓懿哉恭人顯有令子貴不以爵富不以貲祿養  
榮封惟德之宜古渤之郊新壠是卜惟後之昌過者其  
肅

義官高君墓誌銘

君諱爵字汝修姓高氏贈刑部員外郎敬之中子故浙  
江按察僉事舉之弟今通政參議祿之兄其上世見故  
大學士商文毅公所為君父誌君生而聰聞愿慈得父

兄意少長受春秋於新安汪雲先生日事佔畢弗懈時  
出其所為文與士角裒然不越繩槩而員外公已老命  
綜其家務遂棄鉛槧去從事貿易走川陸餘三十年操  
舍畸贏節縮浮費百需具足家用有成由是僉憲得畢  
力於公家參議得一心儒業皆君之功君事父母仳仳  
承志恒懼失其歡飲食非滫瀡不以進執喪孔哀贈寔  
如禮時祀必蠲潔豆登屏伏歲事若聞謦欬君主家握  
泉布出內一以公不自殖視兄弟之子與己子煦育恒

均與人交慙而不競若語涉臧否亦未始媿媿以為賢  
惠窮振阮憐憐如有弗及嘗西入關遇歲祲有勸分之  
令君與出粟濟饑者受冠帶而歸然居恒泊如也取號  
半舫以寓簡遠自適之意君松江上海人中世徙京師  
占籍順天宛平君生正統癸亥三月二十有二日卒弘  
治甲寅六月四日得年五十有二配江寧曾氏今武定  
州判廷宣之從子內行肅雖姻黨稱之子男一人曰鈺  
順天府儒學生女一人曰淑柔適都督李公之子瑾先

君卒孫男二人曰海曰淵孫女一人曰善簡釭將以卒之年七月某日奉柩祔於先塋而參議茹泣自為狀來謁銘惟君所存幾于銅鞮伯華之行而所膺比于簪褭公乘之爵法宜有銘以白於後且君所從汪雲先生又予鄉好也是烏可辭銘曰

惟燕高氏發原于淞慶緒而弘業殖而豐粵汝修君兄弟繼顯退然中居篤槃于善學而弗施亦政于家命之不辰義聲孔嘉先兆協從有綿百禩有克嗣興永妥于

是

貞靖先生秦君墓誌銘

弘治七年冬十一月十有六日無錫修敬秦君景暘父  
壽八十五終于里第之正寢自守令而下寓公姻戚來  
弔哭無虛日友人李舜明輩倡曰君嘗用子貴受封承  
德郎兵部主事中憲大夫武昌知府命再加而益崇然  
君不自侈人亦相號曰修敬以德而不以爵今茲告終  
宜合鄉評考古義以清白守節寬樂令終二法私諡君

曰貞靖先生何如衆皆曰然又曰不銘無以詔後人乃致狀京師請銘而猥及予噫予與君相識幾二十年惡可辭銘哉君之先居高郵出宋國史編修觀觀子湛紹興中通判常州卒官家焉至君五世祖瑞五又自常州定居無錫之富安鄉曾祖仲益祖彥和考季昇皆以行義高里中母惠氏生君諱旭景暘父其字也五歲失恃知哀慕及長甚莊重警敏讀書彊記過人族長老異之曰是可干祿矣君以單子請終養不肯治舉業正統中

長區賦久之亦不屑為退益究心問學不事章句嘗讀  
魯論至修己以敬慊然曰此君子自治之萬金良藥也  
取修敬二字顏所居室凡行已接物一以是為準家庭  
內外斬斬僮僕各職無敢譁者父疾夜稽顙北辰求代  
死髮為之變白及卒哀毀過制事繼母而盡禮教育其  
孤弟終身一甘味亦必割餉之乃已時祀豫戒雖老彌  
謹迪子孫以禮義不得事豪侈君年既高行益成里有  
為不善者相戒勿令秦翁知人有急隨分濟之不恡或

貸金商於外而被溺懼無以償欲自縊君召慰曰免葬  
魚腹中幸矣尚願其他耶還其券晚尤謙抑不出邑大  
夫歲行鄉射禮請正賓席亦不赴獨喜佳山水約斯文  
老人即幽絕處結碧山吟社月一會會即觴詠為樂而  
君詩恒擅場君初學詩鄉先生余同文時出語驚坐侍  
德成始終號能詩且自負獨愛君作曰是後必詩鳴君  
詩醲郁峻整諸體咸備有集若干卷君卒之夕端坐不  
廢巾櫛子孫進問所欲言曰吾得於世多矣奚言其達



生委命如此配殷氏先卒贈恭人賢明之行誦法姍鄙  
子男三人長夔天順庚辰進士歷官江西右布政使清  
恪有文未老以疾自免士論惜之次旦次奭號雙孝有  
司奏旌其門孫男四長鈞次銓次銳俱儒學生次鉉女  
十適某某曾孫男三俱幼惟先尚書襄毅公守南都日  
夔在部屬先公器之予獲與之友每道錫山必進謁君  
相與講道論詩竊意君非今之人而幸其不我棄也惟  
平生宜有紀述以見世講而况夔千里相託之重哉君

墓在邑龍山與殷恭人合兆葬以某年某月某日銘曰  
相昔靖節遯世弗施亦有貞曜克昌厥詩中窺古人懿  
彼修敬蓋棺自今鄉論有定

大中大夫資治少尹南京太僕卿張公神道碑

銘

南京太僕卿張公以弘治六年八月十四日卒于官其  
子瓊以訃聞事下禮部得旨遣官祭其家命有司營葬  
悉如令瓊以是歲九月十七日奉柩葬青苑留村先塋

以公位九卿秩三品法得樹碑神道爰奉狀以請銘予  
與公同年友也義不忍辭序而銘之序曰公諱謙字益  
之世居定州為大族至姓其地曰東張村五世思敬祖  
始遷保定清苑遂為其邑人高祖福榮曾祖材興祖旺  
三世皆不仕以積善聞里中考綱始仕上林苑監典簿  
以公貴贈祖考皆亞中大夫南京太僕卿祖妣王氏贈  
淑人妣王氏贈太淑人公生魁梧不類凡子典簿公愛  
之俾從塾師聰悟日甚遂為儒學生能力學弗懈志必

亢其宗舉成化丙戌進士時年廿五戊子授禮部給事  
即偁偁自將封駁之際不以人言為前却辛卯歲侵民  
流亡相屬詔糴京儲米數十萬賑之公在中所全活者  
甚衆三載受勅階徵仕郎會都御史韓雍總兩廣軍事  
與中貴人交惡命公往勘之公咨詢鈎考持以至公盡  
得其狀還奏稱旨甲午陞左給事中乙未陞都給事中  
值今上在東宮加冠有白金彩幣之賜公長諫垣遇災  
變及時政闕失每每進說多有裨於治體其止度僧道

幾萬言尤切直六科奏對音吐鳴啗憲廟識其人特陞鴻臚左少卿一歲中再轉尚寶卿凡誥勅符璽牌號及諸禁衛番直莅事之際敬慎彌至甲辰郊享有金織彩幣之賜三載受誥進奉政大夫乙巳用吏部薦陞南京太僕寺卿一以正率下剷除積弊禁革貪汙歲省費甚鉅尋奏馬政便民四事多見施行丁未上太皇徽號凡親在者得賜誥而公母夫人在堂無恙命下乃以壽終又獲祭葬之典人以為榮庚戌服闋復任以三載上京

遇皇太子誕生有金織彩幣之賜進階大中大夫資治少尹許一子入國學還任值加恩南京諸司復被文綺之賜未幾而疾作得年五十有二配同邑龍氏賢明之行稱於姻婭封淑人子男二長瓊次瑤皆國子生孫男二長繼祖次續祖女五皆聘良族公天性鯁樸所居官務求盡職論事可否不苟同雖以此取憎忌不恤事母夫人極意奉養得其歡心與三弟謹誠讓相友睦讓忽先逝公哭之慟遂以捐館平生樂善好施鄉里有婚喪

不能舉者多助之奩賻嘗退朝見寔甚惻然召至家易其衣履遣去不問姓氏所存如此予同榜士三百五十人其間材局之閎練核之久若張公蓋不多得也人方僣其有顯擢受隆委以大其設施於盛時而止於是惜哉銘曰

鎮定之間風土厚龐鉅夫魁人率生其邦碩哉張公奮身科甲如鵬之騫而力不乏長貳諫垣帝謂公堪相古九卿公歷其三外乘使輶內補袞職謂公弗施屢奏成

績文繡之貴鸞誥之華謂公弗顯恩亦孔嘉胡履方亨  
而壽不逮賁志未償聞者興慨留村故里賜兆相望孰  
如張氏赫赫維桑有龔翠珉天祿在首銘以貞之永昭  
厥後

迪功郎陝西狄道縣丞周君墓碣銘

我外舅周君自陝歸洛四十年高潔之行清雋之才洛  
人往往能道之而末學小子不克拜牀下聽緒言成化  
中猥蒙一詩詞意渾成惠教諄復宛然古風人之義也



不佞因和一章為壽且繼此將請益而君不可作矣君之子瑀致狀京師託今太常少卿李璋及其弟錦衣千戶玠請走銘璋玠與走之妻皆故大學士文達公之子君之甥也故走不敢以謏劣辭按狀君諱端儀字士瞻一字廷表世為洛人其先具見君之考監察御史安慶知府諱濟之銘君生秀穎過人甫成童即侍父官江南所至友其地之賢者學日以成尤負遠識一蜀倅過洛以白金彩幣貽君君斥之曰吾父按蜀而予受賂於家

理乎倅大慙去安慶公卒於官府僚闕後門以俟發引  
君佯諾之丙夜集輿夫布儀物篝燈鳴鼓奉柩自正門  
出府僚嗟異抵洛居喪盡禮不用浮屠法服除益從郡  
名儒講授諸經史及理性之說得其肯綮不樂事舉業  
久之有司奉詔舉君文學才行至京師送試內閣中優  
等吏部銓授陝西臨洮府狄道縣丞始至吏疑君儒者  
未更事君舉錯應酬犁然有緒案牘不能煩部餽河州  
有麥若干石未納而主者誤與實收納戶驚喜告君君

曰是豈可幸其誤而陷之罪哉亟令送完部使者委修學宮知縣難之君笑曰是在我乃先汰夫之老穉且病者里役三百人為三番番役十日令各攜薪米願休者人出穀一斗積穀數百石物料所需咸足迨落成而有贏餘焉嘗出見巡卒一婦一女負禾一束於背云是盜者君疑焉即立訊而釋之蓋盜棄禾於婦門誤捕之者一童子牧羊怨家以已羊雜其間斃之而誣其盜君詰之曰羊大人穉惡乎盜怨家驚伏一婦人持帕懇有男

子強覆其首者君曰爾不出拜乎則安得此帕果已許  
嫁而終欲改適者卒不聽之易其明決果斷類此歲饑  
多盜鄉落皆然薪達旦君密緝之得劇盜四十人盜為  
哀息北師入邊邊吏令民一丁運粟五斗以濟師君蹙  
然曰民有貧富而槩令之輸非法意請富者輸貧者免  
有事吾自當之民大驩擁送曰周侯真我父母君在官  
將九載春秋未六十語諸子曰吾少嘗夢人書碧雲深  
處四字遺我是教之退處也吾豈有所牟利而僕僕於

此哉即日稱疾請致政而歸君生永樂甲午十月二十  
五日卒弘治乙卯三月二十日享壽八十有一歲配某  
氏與君聯德鄉黨稱之子男二長曰魯為鄉塾師次曰  
瑤被選承伊府郡主授中奉大夫宗人府儀賓孫男一  
曰鼎洛陽縣學生孫女三君性孝友母孺人封氏有疾  
每夜分籲禱求以身代時仲春母思櫻桃不得君終身  
不食櫻桃君姊妹各一姊即文達公夫人妹早孤在室  
君許府學生王讓壻之時讓家貧甚人不知其賢也後

仕洛國學錄夫婦偕老人謂君知人君居官廉介自守  
不屈於物文達公在銓部君以薦至未嘗事干謁一語  
不合即請去文達為之遜謝其教子弟極嚴內外之間  
斬斬如也退休日足不至官府營別墅於上宮至必命  
酌賦詩盡歡名園勝蹟吟賞殆遍而於天時物理人情  
世態一寓於詩號其稿曰歸田錄凡數千篇銘曰

惟古洛社號多喆人流風所漸百代如新品侶周君亦  
洛之秀膺薦而陞惠政孔茂宦途聿振耒老而休白首

朱顏婆娑林丘抗塵之懷展也非晉詩以適情匪唐之  
徇有壽踰耄有子克承惟君所登德善之徵一竊隆然  
洛川之蒞我刻文兮愧彼名世

大同中屯衛百戶徐君墓誌銘

大同中屯衛百戶徐君卒葬河間郡城東之八里莊今  
二十有四年矣未有銘其子昂將奉其繼母韓氏以附  
而自為狀請予銘追納壙中惟先少保襄毅公實善君  
而予又獲與昂友誼不可辭則諾而書之曰君諱貴字

汝良世居永平之撫寧為鉅家宋元以來率有顯者其  
塋次之封碑猶屹然存自君大父以上其世牒行履多  
燬於兵燹莫可考君父諱才始仗劍從文廟靖內難渡  
江以功授隆慶左衛百戶母魯氏女君生而沉毅寡言  
笑身長八尺有畸廣額脩髯見者知為將種然君不以  
騎射自足日從師講學尤攻於書數時大母楚夫人年  
八十餘尚無恙而隆慶公數從幸家用恒弗給君傭書  
以養二母會文廟定都北京凡征討諸臣家在南京者



皆召還君乃奉魯夫人北來久之隆慶公改大同中屯  
衛治河間以目疾不任事言於朝請以君代時軍政草  
創自衛官以下多不事事凡格律條章悉君贊之由是  
屬吏有所持循而軍士受約束無敢譁者戎務一新衛  
官禮君若先生長者正統己巳北征之蟻君亦在行得  
生還而僭從兩人不知君所在先以其名馬及白金數  
錠歸其家無敢私盖君平素能以恩義結下如此景泰  
初四方多警太監王公敏受命鎮易州察公名欲置之

幕府君避不往見王公請於上許之然公實以謹畏聞君悉心右左凡事弗便者規正再三公不為忤既而移鎮陝西守備南京皆挾君與俱而王公南京最久英廟嘗謂執政曰王敏之所行恒鮮戾者以有徐百戶輔之蓋英廟在位於方鎮事無巨細必先知故也天順甲申君引年乞歸王公固留之不獲尚書蕭文昭公侍郎廖恭敏公皆稱其安恬非流輩可及以詩贈之君還河間雖老矣猶手不釋卷語後進必惓惓以善行相勉端居

之暇結郡中諸老為耆年會以自適聲色之嬉一無所  
好嘗謂諸子曰我每欲立功邊陲沒身王事而志弗遂  
天也汝曹宜識之其卒成化辛卯六月壬寅距生永樂  
丁亥七月丁卯享年六十有五配支氏有賢行先君二  
十五年卒繼韓氏側室潘氏子男四人長昇嗣百戶次  
某次昂太學生支出次暹潘出女三人長玉適百戶劉  
浩次金適千戶葉恭次寶適衛鎮撫韓鳳孫男十二人  
長自新今嗣百戶次自勉自勤自習自學自信自修自

誠自恂自謙自讓自仁孫女六人長宏適指揮劉涇次  
安適指揮李景暘次寧在室次宸許適指揮從子溫棠  
次宜適指揮子董翔鳳次容許適千戶子李某次憲次  
宥俱在室曾孫男三人長公顯次公輔公從嗚呼若君  
之所蘊所立亦可謂武弁之表表者矣然位不稱德識  
者憾之顧有子若昂雖屢屈有司而學益勵行益修所  
以為君之光於異時者固在於斯乎銘曰

猗嗟徐君材武且文克贊戎機不愧前勲猗嗟徐君幕

府有聞名徹帝聰遠業方殷猗嗟徐君忽捐世氛膺膺  
瀛東聿妥高墳猗嗟徐君一子空羣嗣有耿光載揚其  
芬

義官岑君墓表

君諱瓊字廷玉姓岑氏其先閩人曰元輔者當宋季仕  
瓊州日卜築城南渡之東岼家焉曾大父召福大父孟  
清父志能三世皆有行義聞其鄉而志能號朴翁娶劉  
氏生君君甫七歲喪父八歲知讀書一日有感於王裒

事泣然曰是無惑乎古之人也每朴翁忌日輒悲泣不食衣不純采終其身奉母劉益孝謹飲食非旨甘服用之具非周且善不以進劉安之曰是善事我君器局峻整有心計自以早孤思所以亢其宗者勤生業廣樹藝不遺餘力家日豐然性高雅樂施予略不以其有自得去舊居三舍許擇別墅之勝者曰藤竹墩曰豐里鑿池闢園建亭屋聚圖籍其中藏修游息行益飭名益美景泰中歲大侵君出粟二千石助有司賑饑用恩例授義

官天順中雷廉州兵荒益甚復出粟如往歲有詔旌其  
門匠營度費甚鉅君不忍曰吾本以濟民今困之不可  
固辭乃已人以是更賢之郡學大成殿敝君首出錢二  
百千佐繕理釋老氏有以祝釐來告者君亦應之捐田  
至百畝不怙曰吾所以有今日獲安老太平者皆上賜  
也立小學延名儒教鄉之子弟孤寒者為供其學資里  
之娶無奩喪無槨與貸不能償者多候君君一一料理  
之俾不失所君年四十未有子至五十餘得丈夫子五

人人以為力善之應君卒以成化丙午四月九日享年七十有九距生永樂辛卯十二月二十有三日娶李氏郡文昌著姓真之女孝敬嚴淑協君起家姻鄙師其賢卒以成化乙巳十一月十有一日享年六十有一距生洪熙乙巳十二月二十有五五男者長英為郡學生次蘭次芳餘尚幼女三人長適林宏次適國學生吳琇次適李孟芳英等以歲丁未正月一日奉君夫婦合葬文昌之白至原郡守李公和誌其壙而未有表英之室



今大學士邱公女也因省公京師以狀來請予辱公知  
愛且嘗聞君之詳則誦其狀而歎曰嗚呼若君者起海  
上一孤童子能振其家蕃其先人之胤系而與有活民  
裕國之勞顯受命服表其宅里置身於古公士上造之  
列而不愧焉豈非一鄉之傑出者哉矧英之才得親炙  
耆俊以大成其器業於異時求所以為顯揚者可卜也  
是宜書之為世勸

劉氏二親墓表

此廬陵東堂劉君觀孚及其配王孺人之墓劉在安福  
號巨家其居邑荆山者一析居廬陵水口再析居江背  
東堂為兩族君則東堂之彥也其先曰如初值元季紅  
巾兵變倡義保所居之玉成山為寇所乘獨遺其幼子  
以安生奇節以安既長有材局復其家又建讀書樓訓  
子孫麟原王公為記以安奇節生不器而業益振且喜  
為義舉嘗出白金十斤修郡學予官不受又踵前志葺  
樓以貯圖籍而劉文安公記之君之考也君生碩敏寡

言笑慎作為奉親甚孝與二弟觀民觀正相友善二弟亦為義舉和其兄置義莊里中儲穀數千斛歲饑輒發之助有司以賑並用恩例為義官君不自多也又作凝秀樓具慶堂與讀書樓相峙諸君子多予其有堂構之功者然君產日拓貲日豐而尚儉素奉賓供祀外澹然無所嗜曰習侈無以示子孫樂施予趨人之急恒恐弗逮病涉者建橋貧死者予槨鄉之人事不集競不平者必求白於君君不為勢誣不為弱亢一裁之以公為人

鮮或訾之者年六十有七弘治己酉十月二十日無疾卒王出廬陵汝源亦名宗其先有梅邊先生者宋末奇士也孺人性慧淑歸劉氏內外尊幼咸宜之而奉親友弟振困周乏持已接人諸美事孺人相成之力居多不幸年四十有一卒於天順甲申九月二十三日子男三長禎兆為儒學生早世次禎宣次禎獻女三適良族禎宣以君卒之明年奉葬里之梅花郭寨傍花嶺凹合于王孺人之兆間來京師託其鄉先達春坊諭德少司成

劉君道亨求予表其墓曰地雖吉而幽閔懼先德之弗彰也予觀史之論人非奇男烈婦不在表異之列而平世常德無所動人之聽聞者恒泯泯焉是豈孔子從先進而思有恒之意哉若劉君嗣其先業益光大之而又得王孺人為之配不以文顯不以爵貴可不謂一鄉之有常德者哉矧劉之先所積遠矣一厄仆元季仆而再興及今百餘年將不有出而振於時以為君夫婦榮者用以昭天之定為善慶之可取必而弗舛焉者乎是宜

最行勒石告諸來者而因以勗其後之人焉

孺人宋氏墓誌銘

弘治甲寅秋尚寶司丞鄭宗仁上疏言臣母孺人宋不  
幸老有疾在故鄉不得朝夕省視奉湯藥敢昧死請告  
詔許之抵家之明年春孺人疾瘳語宗仁曰忠孝一也  
爾宜遄歸事天子不得以我故久在告貽親憂宗仁頓  
首受命還朝之三月孺人疾作竟弗起乙卯夏六月三  
日也君子以是嘉孺人之賢與宗仁之孝宗仁既得請

解官持服乃奉禮科左給事中孫君孺之狀來乞銘予  
於宗仁同鄉竊聞孺人之淑德甚久按狀而銘之孺人  
諱瑗果河間任丘人曾大父而上多隱不仕大父昱父  
鳳俱以善行聞孺人生有容德寡言笑樂女紅聽講小  
學列女傳諸書往往通其大義母苗氏鍾愛之曰吾女  
非名士弗許同里鄭氏有子綱甚賢鳳及苗心重之乃  
聽其委禽而以孺人歸焉孺人事舅姑時其起居候其  
謦欬躬事飲膳浣濯弗倦舅姑安之曰鄭氏有婦哉鄭

素以產高其鄉孺人恒以義勉其夫君曰積而弗散是  
撲滿也由是其夫君遇歲侵即大發廩以賑饑者又以  
餘力周其族鄰不能婚者助奩不能葬者予槨力田服  
賈以兼并壟斷為恥孺人贊其夫君教子尤力故宗仁  
起進士甲科成名瑣闥間受勅命封父徵仕郎戶科給  
事中封母孺人里中莫不以為榮孺人生永樂庚子八  
月十二日享壽六十有六子男二長即宗仁次宗義亦  
以入粟補官女三長適巡檢馬弘次適謝恩次適史文



信皆儒學生孫男五長沂次瀛次溥次沆次澍女二皆  
許聘名族曾孫男一女三宗仁歸奉襄事而瀛以儒學  
生上京師就試秋闈因使來連銘曰卜以是歲八月二  
十二日將奉窆孺人於某鄉某原銘曰

有美令儀惟宋之媛相攸德門惟鄭之彥於顯慈訓卓  
彼嗣人近侍有聲慶原其親錫命輝煌宜耄而壯孰遽  
逝兮捐此祿養故丘隱隱吉壤載占玄室勒銘用昭其  
潛

順德府儒學教授黃先生墓誌銘

閩之莆士治尚書極精其講授皆有師承其出就試一藩在選恒居他經十五上禮部天下士莫敢齒焉若精是經又兼治他經而行檢可方古人如我黃先生者亦可一二見然位弗稱德抱道以終固其命之不淑哉先生諱綸字廷經本唐侍御史滔之裔世居莆之烏門曾祖憲成祖孟珍皆以行義重鄉井父韶始以尚書舉進士為戶部主事母詹氏亦名宗先生生有美質早失所

侍以童子居喪悉合禮度主事君在京師聞而奇之俾授尚書於季父廣元教諭諤遂以興化學生中景泰丙子鄉試明年會試中乙榜授汜水教諭汜水自開學士無與科名者先生教數年立條約嚴課試士習一變而館下多成名時提學副使劉昌慎許可獨記其新學曰黃某博學甚文誠實端慤諸生既樂得師而民亦樂於學之有教其言如此滿九載汜水人上狀願得黃教諭知縣事李曹州在吏部將從之而侍郎崔公順德人遂

言其郡學之弛乃以先生為順德教授久之順德士翕然化服往往取進士躋顯位視汜水益盛滿六載聞主事公之喪哀毀踰禮遂致疾沒於順德學舍時成化甲午四月望日也得年若干先生負學識精於鑒采天順壬午同考順天府鄉試閱尚書卷取今禮部尚書倪岳侍郎兼學士李東陽太常卿兼學士程敏政乙酉同考應天府鄉試閱詩卷取故詹事兼學士陸簡嘗一主考湖廣收士亦多先生自釋褐歷教二庠所得俸金悉寄

上主事公自奉極約而處之裕如聞計日至不能自存  
見者憫惻處庶弟恩義周悉與同出無異配戴氏廣東  
按察司照磨鼎之女弟肅雖之行著稱一族與先生恭  
儉相老尤人所難先一歲卒得年若干子男一曰堂三  
女適林居潔蔡子濂鄭華璋皆故家子孫男二遂宗元  
宗先生以成化己亥葬邑天馬山之麓戴氏祔焉未有  
銘其墓者今二十一年矣堂以書告其季父今戶部主  
事顯一以其同宗翰林庶吉士瀾之狀來屬銘憶壬午

之歲敏政獲得雋於秋試時先生嘗力言於主考請寘  
首選主考者銜先生位下而專抑寘第二先生每以為  
不憚而敏政無似其何足以當君子之獎進出於尋常  
若此哉追惟平昔報德無期而堂千里以書見託不敢  
以鄙樸辭也序而銘之銘曰

守儒一官閱歲十八教嚴考公孰遺弗達哀毀沒世斯  
孝之純猗嗟若人其生弗辰惟古賢喆志在為己人不  
我知害愠害喜青山之原有寧一丘孰銘之幽孰揚其

休

贈文林郎監察御史吳君孺人汪氏合葬墓誌

銘

君諱綱字廷振世居歙西澄潭徙莘墟故贈職方郎諱  
仕仁之孫兵部侍郎諱寧之子今監察御史瀚之父其  
先世具大學士商文毅公所為銘侍郎公起進士歷三  
朝為時名臣有五男君其長也次曰縉興國知州曰紳  
順天府通判曰紋曰綺皆克家而君尤恢穎少治尚書

業舉子垂成值正統末侍郎公以憂勤違和得請歸治疾君遂里居不復出且曰士不見於世則施之家不足以及人猶可善其子弟患不為爾蓋君侍公三十年左右就養務樂其心志率佃傭女織男耕咸職其職無敢懈棄家用大充歲時奉奠饋禮賓戚備婚喪百務井然一毫不以相撓公安之恒稱其孝壽八十餘乃終君與諸弟雖異出而相友愛紳紋及女弟之子汪正資遣從師遠外三人者果前後薦於鄉正遂舉進士歷官知辰



州府君凡四娶其先芝黃程氏繼兩汪氏一出歛潛川  
一出休寧舊市而陳氏晚繼並肅雖相成壺內無鬻言  
已所有田不自殖捐以入公費弗愆尤樂施予振窮乏  
汪富陳振皆君內之兄子孱而家圯君以屋處之又衣  
食之久不衰吳歛名宗至侍郎公益顯君嗣之不矜家  
法益備鄉人無少長悉重君一時公卿家子孫良自以  
為弗及君偉瀚而教之力曰是必亢吾宗然德業之成  
自內始為擇配休寧坑口孫氏又擇繼歛南方氏果賢

孫出處士慎樞方出光祿署丞員蓋君保家裕後有遠  
識類此瀚舉進士明年歸省而君卒授御史之三年獲  
勅命贈君文林郎如其官休寧汪氏贈孺人陳氏封孺  
人新安諸汪在歙休寧特甚孺人為舊市隱君志道女  
有至性歸吳甚宜然不逮其姑汪宜人益謹事公以勤  
儉相夫而倡其家人娣姒咸讓蓋方歸寧遽以疾告弗  
起君卒成化丙午六月二日享年六十有五汪孺人卒  
天順壬午三月六日僅年三十有二子男一即瀚也女

三長適槐充胡以盛次適潛川汪惟潤次許聘潛川汪  
某孫男四人長楫次材次相次幼弘治乙卯侍御受命  
出按浙江前期奉辰州君之狀以告曰瀚十歲而喪先  
孺人不克襄事先君捐館亦未之卜恒惕然弗自安茲  
獲兆於歛西某山之原將用某年某月某日奉以合葬  
先君位中先孺人位左而虛其右幸執事畀之銘予晚  
生嘗一拜侍郎公於堂及見君而去侍御講通家之好  
甚厚誼不敢辭銘曰

相昔范公有賢伯器弗顯于時就其諸季桓桓司馬懷  
范之憂懿哉封君純佑與儔良配弗年鍾美一嗣繩武  
在廷孰尚其志奉揚褒典載卜新阡紀行琢辭百世之  
傳

默齋先生鄭君墓誌銘

永豐有君子曰默齋先生鄭君諱賢字顯才其為人純  
敏簡厚喜問學蓋親其貌耳其言宛就古人也少治尚  
書業可舉進士而阨於疾不獲出自見天順初有以經

明行修薦者辭不起鄉射禮行有司必致聘為賓僕而  
君亦以齒德弗逮辭退處一室左圖右書謂聖賢之學  
非在言說以默題其齋其教子弟極嚴詰朝則令就家  
塾親師友夜則給燈火課勤怠正襟危坐且訓且讀刻  
燭計時大約盡二鼓乃已君孝友天至雖奩貲亦不敢  
私蓄出納一聽父母時祀預潔粢盛習儀節齋心秉誠  
率家人就位拜跪奠獻無敢譁者與諸兄同學相愛無  
間言從子軾年十二而孤訓育如已子軾果舉進士為

御史有聲君交朋友不欺是是非非一折之以道義性善飲醉而益恭以多病學醫遂深究素難及諸家要訣間推以活人人德而謝之弗受治家則先之以儉勤惟市古圖籍振窮乏不恤佃人客戶有所輸而羨者還其粟貧死而不能償者燔其券君長子軌嘗輸馬於邊請冠帶為君榮君得文書叱曰若安得以是束我玉山令莆人陳孟寬素重君聞即相語曰此朝廷著令烏可輕也君乃不復言君為文典雅尤長於古律詩字法率更

屏去媚好所著有默齋集若干卷君之先出宋忠臣同  
州守威愍之後元末避地自玉山徙永豐之石梯又徙  
東里子姓日蕃君祖大德父應麟皆儒者母某氏君生  
宣德戊申九月一日卒弘治乙卯正月二十日享年六  
十有八娶江山胡氏與君聯德嫻黨稱其賢子男三長  
即軌舉進士今吏部文選主事次幹克家早世次軸儒  
學生女一適邑之排山周禎孫男七長濂儒學生次洛  
次汶次漳次洙次泗次源孫女三軌將以某年某月某

日葬君某鄉某山之原以兵科給事中周君序之狀來  
請銘序於君為外姪稱君之碩節高誼可質諸鬼神無  
媿其言殆有徵也噫古之所為篤行君子若鄭君者非  
其人與銘曰

惟古之人君子是則世方譊譊我獨以默君非不言思  
力於行學以默識行以默成通德之門威愍之系君將  
紹之展也無斂矧復有子宰屬攸司引爾世烈庶其在  
茲紀述諷吟亦復有稿傳豈在文驗厥深造玉山勝地



埋玉其中貞石勒銘君子之終

承事郎譚君墓誌銘

君諱瑛字彥華譚姓滁之清流人爲武畧將軍護衛千  
戶追封崇安侯勝之曾孫贈奉天靖難推誠宣力武臣  
特進榮祿大夫柱國崇安壯節侯之孫新寧伯忠之子  
今太保兼太子太傅嗣新寧伯祐之叔父君生貴家性  
淳樸不事紈綺之習恒以壯節侯父子開國靖難並有  
功著於盟府思以忠勇自奮不果則又曰奚必爲是哉

施於有家亦足以見志矣遂身任家政事父母蚤夜不  
少懈君本岳夫人子而奉嫡母朱夫人如生已御僮僕  
治田宅弛張間悉有規緒親賓還往慶弔以時而豐約  
惟所當兄璟嗣爵當正統末出守浙江卒於鎮長子裕  
亦不祿而次子方在髫髻今太保公也君既茹苦襄事  
即擇師教之曰此子不凡當大吾家時以先烈語之太  
保公奉訓惟謹受知列聖命莅前府總神機兵兼督十  
二營軍事進陪廟謨忠恪靖慎蓋君左右之力居多每

旬休太保公率父子上壽君為之盡歡曰先壯節不死  
矣予復何憾成化中淮揚饑詔官賑之君遣人輸之粟  
以助恩例授承事郎秩視七品然君亦不自侈愛居山  
莊課家人樹藝為樂因號玉泉居士京師名流多禮重  
其為人君素苦痰疾忽甚太保公憂之數迎醫躬視湯  
藥候起居如父君安之至屬續無他繫慮惟勉太保公  
盡心國事人兩賢之時弘治八年三月一日也距生宣  
德七年七月六日享年六十有二配錢氏先三十年卒

繼趙氏生子男二長祿次禮女二長適虎賁左衛指揮使張宗次在室孫男一尚幼太保公卜以是年四月八日奉君葬石徑山祖塋之右以錢夫人祔焉前期手狀其行請予銘予承乏史氏親見壯節侯佐文廟渡江時事未嘗不偉其忠意其後之人必多賢者以行其弓裘之業於無窮若君亦可謂稱其家者歟銘曰

有偉前烈孰嗣而方有後賢人孰啟而昌嗣又啟之惟譚仲父孝友在躬其容僂僂謂君弗顯亦有冠鞶家政

孔修榮不以官劍履世藏君妥其右玄堂刻銘永示厥後

孺人馮氏墓誌銘

孺人馮姓世為吳人而籍京師故廣東按察副使定之女今通政參議趙公昂之婦光祿少卿竑之妻年三十有九而卒卒之日予往弔之參議公泣謂予曰吾與憲副同學交莫逆通家還往新婦生七歲即聰穎如成人憲副及張夫人亦見竑子不凡恒語我夫婦曰必以是

女妻若子夫婦大喜既入門事我及其姑潘夫人極孝敬吾喜賓客新婦率家人治具必精腆恆吾意歲時奉祀及有所慶弔於親故里巷相其姑以行舉不失節吾老矣而喪賢婦天乎奈何少卿亦泣謂予曰孺人之來歸也吾尚家食恒日夜勸予曰二父皆以經術顯名子必刻意問學用光吾舅我先公亦瞑目地下矣予感其言以有今日且予自舉進士為刑科給事中歷左右都給事中皆以言為職恒懼以論事獲罪孺人必勉之曰

吾見吾父為御史亦每每論事曰國爾忘家子宜識之  
予年壯未有子孺人亟為娶陳氏曰繼續事重烏少緩  
邪既而陳氏果生男孺人亦繼有男相保愛如一不幸  
得孱疾踰歲不起而 its 所得男先以病夭嗚呼天胡使  
人至此極而予以中歲失此良配也惟先生不鄙而賜  
之銘乎幸矣既而少卿諸弟亦皆哽咽相語曰自有吾  
嫂我兄弟益相友敬蓋飲食衣服器用一無所偏嗜而  
辭氣溫淳恒恐拂人故為娣姒者一相讓如兄弟無後

言若吾嫂之賢何可得也先少保襄毅公與叅議公相友善故叅議公以女妻予季弟敏行亦不幸早世而於孺人之賢則得之稔矣矧重以少卿之請而可以辭銘哉孺人生天順癸丑九月二十四日卒弘治乙卯三月二十七日生男女各一人今所存者女爾以少卿貴受勅命封孺人有柔儀淑行著範閨閭之言考行陳詞誠有如聖製之所褒焉者矣少卿擇歲之四月十七日以孺人祔葬長慶壩祖塋之次銘曰



不妒而有嘉出於已子不壽而獲顯封為不死嗚呼孺人尚妥於此

歛黃處士徐孺人合葬墓誌銘

嗚呼此歛黃處士徐孺人之墓其子為今兵部職方主事華其地為鳳凰村律克原萬羅山其向子午蓋處士之葬也不及誌追樹表焉後十有二年華將奉孺人以祔乃泣為狀請敏政并書之惟處士歛耆舊孺人佐之成其子而殖有家用顯黃氏法不可以不銘君早歲喪

母汪十歲而喪父與壽君兄弟中最穉弱能自飭服儉勤至長老業日以興念非子種學終不足以光世乃送華入郡庠又遣受尚書於閣老商文毅公久之薦於鄉鄉人大驩謂君夫婦之善居子也華五上禮部弗利最之益勤曰命也勿戚華果舉進士令撫之金谿過里日置酒上壽嫺黨畢集處士喜甚曰是雖榮必努力公家以不負今日吾乃安爾華受訓唯謹又一歲以入覲獲再省焉抵任而處士終蓋年七十有六矣華改令岳之

平江也孺人誨之諄諄如其父以是華政美有文用部  
使者薦召入朝復過里鄉人益觀慕以為榮其官職方  
也念母不置會陝有戎事請行計歸日可取道省母未  
行而得計於是孺人年八十有九矣處士諱禎祥字仲  
述所居歛黃屯徙潭渡出唐孝子芮之後惟和易不苟  
喜周窮困奉繼母程如生已事三兄甚友其教華不獨  
事舉業又勉之繼述俾倡立祠享孝子合族人為黃氏  
譜傳焉晚結茅黃山下種樹佚老甫成而不起孺人居

歛朱方亦早失其父處士恩及母胡氏內行甚肅喜儉  
樸晚率其冢婦程介婦汪治女紅如壯時蓋凡勤家恤  
祀逮下裕後之懿與處士媲德而無嫌處士卒成化甲  
辰八月九日孺人卒弘治甲寅十二月二十七日子男  
二雄華雄先卒華即職方君也女一適方塘胡禧孫男  
四瓊珙珪珂女一適鄭村鄭楷曾孫男一鉞女一尚幼  
惟處士夫婦刻喜教子而躋遠壽睹其成蓋天之報施  
善人弗爽也恩被貤封澤其漏泉以昭其令名於一鄉

也有日子與君同郡且重華請乃最羣行而於教子事  
特詳焉又系之銘銘曰

惟歛黃君孝子之裔有聯德兮厥聲孔懿力哉庭訓續  
我世風爰目其成並壽考終於帝降祥一視所積鸞封  
嗣來光此窀穸鳳村協兆山峙川澄貽後有銘錫類之  
徵

百歲程君墓表

貴三公富萬石文章功業名一時者人皆可致之惟壽

則有不可強焉者況壽而至於百有餘歲者哉非上有建極錫福之君而斯人之得於天者獨厚且完烏足致此若吾宗以道君之壽豈直一家之盛哉固海內之所鮮也君與予同出陳將軍程忠壯公之後所居汉口其族以宋端明殿學士涖水先生益顯曾祖煥祖連父安皆力善不仕安娶於吳生君諱實字以道一諱詩其為人淳樸涉獵書史少客江湖間嘗以木易粟至姑蘇貸人值歲侵悉棄不取而歸歸更事畎畝不復出力勤孔

時所入恒倍家居率晨起呼子弟督佃傭各職其職無  
侈以肆夜即課諸孫鳴琴讀書抵夜分乃寢客至張燕  
雄談雖老不倦既老取貲產立券不與子而與孫曰如  
此庶幾可均也君處已待人若易直然皆不失矩度一  
門百口馴馴怡怡號詩禮者或不能及君狀貌頎然兩  
目如漆耳幾垂肩中有毫長二寸許齒髮變矣而白者  
黑脫者生年九十五歲以恩例授冠帶每鄉飲必禮為  
大賓君多辭不至年百有一歲乃終終時盛服呼諸孫

語之曰我將與汝等永訣言訖而蛻君生無疾疢未嘗  
延醫請禱步履如飛終其身不杖殆異人也君生洪武  
乙亥閏九月十七日終於弘治乙卯三月十九日前後  
三娶初姚次黃次吳舉和順不贅族黨稱之子男三人  
德龍德思德良皆先君卒女三人皆有歸孫男九人孫  
女三人曾孫男九人曾孫女六人玄孫男一人予又聞  
君壯歲在吳下遇雨渡而溺自念非除衣鞞無以獲生  
即伏水中褫衣去鞞一躍而起江行遇盜衆潛伏莫敢



動君曰如此示弱舉將不免矣奮出直前搏之盜披靡  
散去然則君所稟之厚且完而加以伉健若此宜其壽  
之過人也因并書之貼其孫俾刻諸墓上之石嗚呼我  
列聖休養涵煦之澤被海內久矣而有人瑞焉乃出於  
新安之程氏得不謹著之以昭其盛於無窮也哉

一樂汪君墓表銘

新安大姓無慮十數而汪為最汪之先率祖唐越國公  
子孫分布列邑而歛潛口為著潛口之汪在宋多顯人

聚族以居不下萬指而一樂君在近時為稱首一樂蓋人以慶君而因以自名者也君諱順童字永德其為人有志操簡默自守人或莫知其何如至其發言勵行率不倍於道名讀書者或弗能及然君又未始不好學自勗也其所學不事佔畢事其大父彥實父士賢兩翁及母張孺人繼母羅孺人最孝生養死葬如禮不伍於流俗與其兄永仁永奇弟永義甚友永仁永義皆不祿遺其孤曰以誠以聰方幼稚凡家政悉君綜之家益裕而


撫教其遺孤皆有立稍長見以聰之子正也慧曰是足  
亢吾宗者遣為學諸生正果以明經舉進士歷南京戶  
部郎中知辰州府事族益華而君為善益力濬皆井成  
廢梁葺舊衢以利居人之飲食來往雖鉅費不吝周窮  
恤匱不責其償甚至於焚券鄉人德之有小忿或相戒  
勿令一樂汪君知或競入有司不可解得君言即解去  
年益高行益尊每歲時或生旦親戚子弟上堂稱壽歡  
動閭里里人兵部侍郎吳公與君生同歲一顯於朝一

隱於鄉有姻婭之好時人謂可比漢王霸及令狐子伯  
兩人君以成化丙午十月廿四日卒卒時無他語惟以  
不墜先訓為言享年八十有八距生洪武己卯八月十  
一日配洪氏出宋少師中孚之後早卒無子繼詹氏鄉  
進士熙之女兄皆名族有婦道子男三人長以輔次以  
受次以澤女二人長適張思浩次適洪永殷亦皆名族  
子孫男七人柳桓楠栻楨植彬孫女七人曾孫男十人  
以輔等卜弘治戊申正月朔合洪氏詹氏葬中鵠鄉大

吉難之原前期以正所具狀使人來京師請表君之墓  
予往歲家居嘗過潛口雖不及拜君然及見以聰君及  
汪之諸彦顧其山水秀環閼閼鱗次竊意其有享德壽  
而名一鄉者當出其間乃今得考叙一樂君之遺行刻  
之貞珉以詔後來則豈非所樂聞而足以慰其夙心也  
哉表之而繼以銘曰

嗚呼是為一樂汪君之墓有三子以承有兩配以祔孰  
云淑人失我鄉度尚有遺芳以篤其祜以行其祚而啓

後人之永慕也



篁墩文集卷四十七